

Naskanyam Yoan Leta

Yoanimna Iriki Naskanyam Leta

Isipkita Yitkak

Onggityam leta irika riga re itmikitijog riga Yoante. I ton itemb leta yirikonj re ama rika Epeso taun kena dide A.D. wan andred (100) kemag momta undwatapu nat.

Si insiemb ji nimog ukoi jog ril onggityam leta irikam:

- 1) *ogenka riga ugoiny God dide Tina B'iga Yesu Keriso kima yipand b'inkindena milend wimenam,*
- 2) *ten nonony omnenam b'anyginena ouyaena yimta undoka gatab rinte ra negir omnik onggityam b'inkindena mile.*

Si opimemb b'anyginena ouyaena rigap inaemb ji ouyaena yiyeneno odede utkunda kima da, “Yet ra onggit gowukoi kima b'itinkeney, ton ita negir ma isma okas. Si onggit penaemb Yesu Godimna B'iga, Ton ma ririr na iminjog riga ji awowim.” I opimemb b'anyginena ouyaena riga b'anyginena wuweny odede da, “Yet ra singi tainy yirkokar okatam, ton b'ogla nony kubir auka mile nena rerarkin onggit gowukoi yirkokar gatab.” I ton kwa riga auyaenento da, “Rada yipa rigat kea yirkokar yokas, gim ke b'ogil mile omnika kesat o riga wa singi iyena mile omnika kesat ma ita tina yirkokar negir ominy.” Si onggit penaemb Yoan odede yit kima gensi amniny da, “Yesu re kea riga ji awonj i Yesu Kerisond gar ke utkunda rigap goro God ake Keriso wa pilwa nena singi b'iyena mile omnika teyananj aji b'ogla daka kwa riga wa pilwa.”

Yirkokarim Yitkak Yesu

1 ¹Simesime! Kon wa terikainy in ra yirkokarim yitkak gatab e. Si itemb yitkak re Yesu Kerisote yet re get ke yibnonj, re God komkesa gasa atobarkinonj. Si sin itmikitijog rigap kea Tin yutkundenonda, i sowaina yirjog ke yir yongonda, i yir ipka yiyenonda i dide sowaina yimip kea yesopaeneno.

²I itemb yirkokar re kea pita awonj. I re sin itemb dadal ngirpu kesa yirkokar yir yongonda, si sin onggit gatab yir ungata yit imemb

apurenenindam, dide ket wa pitapita omnena eyenau. Si itemb yirkokar yibnonj re B'u kima na, aji kea ket sowa pilwa pita awonj. ³Si intemb ji sin wa pitapita omnena eyenau rina re sin yir yongonda dide utkundenonda, nokim da idenat wida kwa yipand sin kima b'itinkisindam. I meraina b'inkena mile re B'u kima e dide Tina B'iga Yesu Keriso kima e. ⁴Si sin onggityam yitkak wa erikaindam re nok mim da idenat sowaina sam yindangir tawik.

Menonim Godimna Ngayand

⁵Si intemb ji bage yit rina re sin Ti pilke utkundenindam dide ket wa pitapita omnena eyenau, it re da God re ngaya e dide Ti pilind awir e kwa nanggamog sibib e yibim. ⁶Ra men nitindenindam da men God kima opima b'inkindenindam aji ra men sibibind menon okatenenyu, si men b'anyginenindam-a i dide men ma opima iminjog yitkak ririrind mile amnikenenindam. ⁷I ra men ngayand menon okatenenyu odede wip ringma re God yibneneny ngayand, si ingkaimemb men mera wingirind yipand b'inkindenindam dide ket Godimna B'iga Yesu, Tina kuste men kilkesa nomnikeneniny komkesa negir mile wa pilke. ⁸I ra men nitindenindam da mera awir im negir mile, men re meralenggyam b'anyginenindam-a dide awir e kwa iminjog yitkak yibim mera pilind. ⁹Si ra men meraina negir mile Godim usekaindam, Ton opima meraina negir mile awir tamnikiny dide ket men kilkip kesa notininy komkesa kaokao mile ke, nokip Ton re Tina tirir omni yitkak iminjog omna riga e dide Ton re negir kesa dimdimjog riga e. ¹⁰I kwa ra men nitindenindam da men maka negir mile amniktondam, si ingkaemb men Godind yommenenyu da Ton re b'anyginena riga e. Si Tina yitkak re awir e yibim mera pilind.

Mera Yim B'akawa Riga Keriso

2 ¹Kor b'igawar! Kon wa opimemb yitkak erikainyin onggit letand re nok mim da idenat win maka negir mile tamnikindam. I yet ra negir mile omnik, mera ita b'irmeka riga Godim pilwa. Si Ton re negir kesa dimdimjog riga Yesu Kerisote. ²Si Ton re meraina negir mile irabikam si b'angga e, i ma mera nena mana aji daka kwa komkesa gowukoi riga wa mana. ³I ra men God ma b'ingawa yit yimta tundokindam, si ingkaemb men imjasu da men Tinim wumir im. ⁴Ra yipa rigat indeny da kon Godim wumir en dide maka ra Tina b'ingawa yit yimta tundokiny, ton re b'anyginena riga e. Si onggit rigam pilind re awir e kwa iminjog yitkak yibim. ⁵I yet ra God ma yit yimta undok, Godimna singi iminjogjog ririrkip ai e yibim ti pilind. Si ingkaemb men wumir yokasu da men re Ti pilnasim wekenyin. ⁶Yet ra b'atgenai da kon Godim pilnate nibnyin, ton b'ogla ija na wimena yeken rija na re Yesu wimena yikenonj.

Sisil B'ingawa Yit

⁷Kor rigawar yena re kon singi eyeninyin! Kon ma sisil b'ingawa yit e iriken, aji kesamyam b'ingawa yit e rina re win yokatonda re win gar ke utkunda mile yotomonda. Si kesam b'ingawa yit re onggityam yitkak e rina re win naskand utkundenonda. ⁸I kon kwa b'usaya sisil b'ingawa yit e iriken rinte re iminjog yitkak yibim Kerisom pilind dide wa pilind. Mop nokip sibib re kea ewaikitonj dide ket iminjog yitkakimna gaya re kea ita ke enyorati yibim. ⁹I yet ra b'atgenai da kon gaya nate nibnyin i ra ton tina gar ke utkunda nanyind o yingganind singi kesa omneneeny, si ton re sibib nata yibneneeny. ¹⁰Aji yet ra tina gar ke utkunda nanyind o yingganind singi iyeneny, si ton re gaya nate yibneneeny. Si onggit gaya pitand ra ma ita tinangga gasate b'uwombenam omneneeny. ¹¹Aji yet ra tina gar ke utkunda nanyind o yingganind singi kesa omneneeny, si ton re sibib nate yibneneeny dide sibib nate yikeneeny. Si ton ma ita wumir aukeneny ritama re ton yikeneeny. Mop nokip kea sibibsi tina yirkip yirdidi amnik.

¹² Kor b'igawar! Kor mop wa pilwa irikam re
nokip God waina negir mile awir amnikiny Kerisomna danda nyi
kaim.

¹³ B'iga b'uwam! Kor mop wa pilwa irikam re
nokip win kea wumir aukitondam Kerisom yete re yibneneeny
otomapu ke ngirpu yu.

Sisil riga! Kor mop wa pilwa irikam re
nokip win kea negir wingawinga Satanand danda kesa yomnonda.

¹⁴ B'igawar! Kor mop wa pilwa irikam re
nokip win kea wumir autondam B'uim.

B'iga b'uwam! Kor mop wa pilwa irikam re
nokip win kea wumir aukitondam Kerisom yete re yibneneeny
otomapu ke ngirpu yu.

Sisil riga! Kor mop wa pilwa irikam re
nokip win re mogim danda
dide Godimna yitkak wa pilnate wimena yikeny
i dide win kea negir wingawinga Satanand danda kesa yomnonda.

¹⁵Win goro singi iyena gowukoi oangga im re wekeny onggit gowukoi wingirind. I yet ra onggityam gowukoi singi iyeny, B'uimna singi re awir e yibim ti pilind. ¹⁶Mop nokip komkesa gasa onggit gowukoyind re insim wekeny, gowukoi rigaina gim ke singi mile i yir ongong ke gim ke singi mile i dide gowukoi wimena ke b'asourena mile. Si onggityam komkesa mile wuweny re ma B'uim pilkaim, aji onggit gowukoi kaim. ¹⁷I onggityam gowukoi dide komkesa gowukoi gim ke singi mile b'etidamkuranj dem, aji yet ra God ma singi mile omnika teyeniny, ton dadal ngirpu kesa wimena e ikeny.

Nonony Yitkak Negir Ouyaena Riga gatab

¹⁸Kor b'igawar! Itemb re kikitum win e. Win kea odede yit utkundonda da Kerisom geja riga ra ita ik dem. Si yu re kea jogjog im Kerisom geja riga pita aukanj. Si ingkaemb men wumir yokatenyu da itemb re kikitum win e. ¹⁹Ton mera pilkena ewaikurto, aji ton re ma iminjog gar ke utkunda riga na wekenonj mera wingirind. Mop nokip rako ton iminjog gar ke utkunda riga wekenonj mera wingirind, ton keako omanda men kima wekeny. Aji ton mera pilke ewaikurto re ouyawa mana da ton komkesa re ma men kima yipand iminjog gar ke utkunda riga im wekeny. ²⁰Si yinayina Keriso kea Yinayina Wingawinga wa etmikitawonj dide Ton ita wa pilind b'imuri yibneneny. Si win komkesa onggit paimemb wumir wekenyit iminjog yitkakim pilind. ²¹Kon ma nok pae wa erikaen da win ma wumir im iminjog yitkak, aji nok pae da win wumir im onggityam iminjog yitkak dide nokip onggit iminjog yitkakim pilke awir e kwa b'anyginena yitkak ik. ²²Si yete ji b'anyginena riga? Si intemb ji b'anyginena riga yete re Yesund yoeny da Ton re ma Godimna B'iga Kerisote. Si yete re B'u ake B'iga aeny, itemb riga re Kerisom geja riga e. ²³I yet ra B'igand isai, ton kwa daka kea B'und yisai. I yet ra B'igam gatab b'atgenai da, "Yesu re Godimna B'iga Kerisote," si ton kwa daka kea B'uim gatab b'agenai da, "Ton re Yesum B'u e." ²⁴Si win b'ogla onggityam yitkak owama teyenindam rina re win b'auyaentondam re win gar ke utkunda mile yotomonda. Si ra win onggityam yitkak owama teyenindam rina re win b'auyaentondam re win gar ke utkunda mile yotomonda, widaka wimena wuwenyit re B'igam pilnasim dide B'uim pilnasim. ²⁵Si itemb ji tirir omni yitkak rina re Keriso meranim tirir yit yindonj. Si inaemb it re da dadal ngirpu kesa yirkokar.

²⁶Kon onggityam yitkak wanim erikainyin re towa gatab e yepim re wen wip eyenanj b'anyginena ouyaena wa. ²⁷Si Keriso kea Yinayina Wingawinga wa akainonj i Ton wa pilnate b'imuri yibneneny dide kwa indama wimena yikeny wa pilind. Si win makwa yena ket singi omninya wen ouyaenam dide gar ke imjatenam iminjog yitkak gatab. Aji Kerisot Yinayina Wingawingand yimuronj wa pilind, si Tonsimemb wen komkesa gatab auyaeneniny. Si onggityam Tina ouyaena re iminjog e dide makwa ita b'anyginena. Si win ija ima wimena tuwenyit Kerisom pilind rija im re Yinayina Wingawingat wen auyaeneniny.

²⁸Kor b'igawar! Si win b'ogla b'obogil wimena tuwenyit Kerisom pilind. Nokim da ra Ton pita tainy dem, idenat men moga kesa dide ingar kesa taukindam Ti wipind Tina opendand. ²⁹Si ra ket win wumir okasya da Keriso re negir kesa dimdimjog Riga e, si ingkaimemb win wumir taindam da yet ra negir kesa dimdimjog mile omnika teyeniny, ton re Kerisom pilke ukendi Godimna b'iga e.

Godimna B'iga

3 ¹Yir de, Abu God re ma sobijog na men singi niyeninonj, nokim da idenat God men nyi notgenainy Tina b'iga ke. Si men insimemb. Si onggit mop paimemb gowukoi rigap maka meranim wumir aukanj, nokip ton ma wumir im Godim. ²Kor rigawar yena re kon singi eyeninyin! Si yu men re God ma b'iga im. Aji men ma ririr e nonyik okatenyu ridede wip im men yimta ke taukindam. I men wumir im da ra Keriso pita tainy dem, meda ija ima wip taukindam dem Ton re dide. Nokip men ija e wip Tin yir ongu dem rija e re Ton yibim. ³I komkesa riga yepim re onggityam warim b'ogil isma yokatenyi Kerisom pilind, ton towalenggyam wimena wuweny re kilkip kesa im odede ringma re Keriso kilkip kesa yibneneny.

⁴I komkesa riga yepim re negir mile omnika eyenanj, ton re gog yit im erbeka eyenanj. Si negir mile re gog yit erbeka mile e. ⁵Aji win wumir im da Keriso re kea pita awonj, nokim da idenat Ton negir mile teomneniny. I dide Ti pilind awir e kwa negir mile yibim. ⁶Yepiya ra Kerisom pilind wimena tuweny, ton ma ket negir mile oikindena nasim tekeny. I yepiya ra negir mile oikindenand tuweny, ton makaya Tin yir yongi dide kwa ton makaya Tinim wumir aukanj. ⁷Kor b'igawar! Goro wen yet wip ramnin b'anyinena ouyaena wa. Yet ra negir kesa dimdimjog mile tamnikeneniny, ton re negir kesa dimdimjog riga e odede ringma re Keriso negir kesa dimdimjog riga yibim. ⁸Yet ra negir mile tamnikeneniny, ton re Satanamna riga e. Nokip Satana re tina otomapu ke negir mile nate yibneneny ngirpu yu. Si God ma B'iga onggit mop penaemb pita awonj, nokim da idenat Ton onggityam Satanamna wiko teomneniny. ⁹Yet ra Godim pilke tukenj, ton ma negir mile oikindena nate yibneneny, nokip Godimna yirkokar yitkak ti pilnate yibneneny. I kwa ton ma ririr e negir mile oikindenam, nokip ton ukendonj re Godim pilkena. ¹⁰Si ingkaemb men angwatenenindam da ton re God ma b'iga im dide ton re Satanamna b'iga im. Si yet ra maka negir kesa dimdimjog mile tamnikeneniny, ton re ma Godimna b'iga e. I kwa yet ra tina gar ke utkunda nanyind o ti yingganind maka singi iyeny, ton re ma God ma b'iga e.

Gar ke Utkunda Riga Wa Wingirind Singi B'iyena Mile

¹¹Mop nokip re men gar ke utkunda mile yotomonda, si men inaemb ji bage yit utkundenonda da men b'ogla mera wingirind singi b'eyeninum. ¹²Goro odede Kain pila taukinam. Ton re negir wingawinga Satanamna riga na, si ton kea ti yingganind yongandonj. Si nangga mop pena tin yongandonj? Mop nokip tina mile re negirjog na aji ti yingganimna mile re negir kesa dimdimjog na. ¹³Gar ke utkunda nany dide yingganwar! Si

wɪn goro kid kesa taininam ra gowukoi rigap wen singi kesa tamnenanj. ¹⁴Si men wumir im da men kea uj ke opandurtondam de yirkokar wa, nokip men opima singi eyenindam mera gar ke utkunda nany dide yingganwar. Si yet ra maka singi b'iyena mile tamnikeneniny, ton re ujim pilnate yibneneny. ¹⁵I yet ra gar ke utkunda ti nanyind o ti yingganind singi kesa omneneny, ton re riga onganda riga e. Si win wumir im da riga onganda rigam re awir e kwa dadal ngirpu kesa yirkokar yibnau ti pilind. ¹⁶Si Yesu Keriso kea Tina yirkokar b'akawonj meranim. Si ingkaemb men wumir yokatonda nangga e iminjog singi b'iyena mile. Si medaka b'ogla meraina yirkokar b'atkindam meraina gar ke utkunda nany dide yingganwarim odede rija na re Yesu Keriso Tina yirkokar b'akawonj meranim. ¹⁷Aji yama na ra gowukoi gasa jogjog ibnainy, dide ra ton yir ong gar ke utkunda ti nanyind o ti yingganind ingaena gasa kesa, i dide kwa ra ton tina gar idok tin kear omnam, si ridede e Godimna singi b'iyena mile ibim ti pilind? ¹⁸Kor b'igawar! Men goro singi b'eyeninum weyat ke opurena nena ke. Aji men b'ogla singi b'eyeninum iminjog omnika ke.

¹⁹Si ingkaemb men wumir okatenyu da men re iminjog Godim pilkaim. Si ija imemb ji men meraina gar danda kima imjati tawamindam Godim wipind. ²⁰Si nangga ma ji rada opima meraina garip negir ma b'isagikam men notinenanj, aji men ma opima moga taindam, nokip meraina gar re ma ukoi e aji God re ukoi jog e dide Ton re wumir e komkesa gasa. ²¹Kor rigawar yena re kon singi eyeninyin! Ra meraina garip maka ra negirim b'isagikam notinenanj, si mera ita moga kesa danda yibim Godim wipind onyitam. ²²I men opima Godim pilke emdenenindam nanggamog mim re men yerkenenyu, nokip men opima Tina b'ingawa yit yimta undokenenindam, dide men insim wiko amnikenenindam ringkae re Ton sam yokateneny. ²³Si intemb ji Tina b'ingawa yit da, men b'ogla Tina B'iga Yesu Kerisomna nyiwim pilind gar ke utkunda oramisu, dide kwa men b'ogla mera wingirind singi b'itienindam rija na re Keriso men ningainonj. ²⁴Si yet ra Godimna b'ingawa yit yimta tundokeneniny, ton re Godim pilnate yibneneny dide God daka ti pilnate yibneneny. I men wumir yokatenyu da, God re mera pilnate yibneneny, nokip Yinayina Wingawinga kea mera pilnate yibneneny yena re God mera nokainonj.

B'anyginena Bageyam Ongwatam Yit

4 ¹Kor rigawar yena re kon singi eyeninyin! Goro komkesa wingawinga iminjog ke takatenindam, aji win b'ogla onggityam wingawinga otonkena teyenindam ongwatam da rika ton Godim pilkaim. Mop nokip jogjog b'anyginena bageyam re opima pita auka wuweny onggit gowukoyind. ²I ija emb ji nya ringma ra win ongwasya Godimna Wingawinga. Ra bageyam yet ra b'atgenai da Yesu Keriso re riga ji kena

ikonj, ton re Yinayina Wingawinga kima e rina re Godim pilke ikonj. ³Aji bageyam yet ra odede Yesum gatab b'atgenai da Ton re ma Godim pilkae, si ton re onggityam wingawinga kima e yete re Kerisom geja riga yibim. Si win kea utkundenonda onggityam Kerisom geja riga gatab da ton ita ik. I yu ton kea ket onggit gowukoi nate yibim. ⁴Kor b'igawar! Win re Godim pilkaim dide win kea onggityam b'anyginena bageyam gou wa amnitondam, mop nokip yete re wa pilind yibim re ukoyam e, aji yete re onggit gowukoyind yibim, ton re ma ukoi jog e. ⁵B'anyginena bageyam re gowukoi ke riga im, si onggit paimemb ton gowukoi ririrind yitkak apurenanj, si gowukoi rigap opima towaina yitkak utkundenanj. ⁶Aji men re Godim pilkaim. Si yet ra Godim wumir tainy, ton opima sin yit nutkundeneniny. Aji yet ra maka Godim pilind ibim, ton ma ita sin yit nutkundeneniny. Si men odede nya kaimemb tangwatanindam iminjog Godimna Wingawinga dide b'anyginena wingawinga.

Singi B'iyena God

⁷Kor rigawar yena re kon singi eyeninyin! Men b'ogla singi b'eyeninum mera wingirind, nokip singi b'iyena mile ik re Godim pilkae. Si yet ra singi b'iyena mile omnikeneny, ton re Godim pilke ukendi riga e dide ton wumir e Godim. ⁸I yet ra maka singi b'iyena mile omnikeneny, ton ma wumir e Godim, nokip God re singi b'iyena God e. ⁹God odede naemb Tina singi b'iyena mile pita yomnonj mera wingirind. Si God Tina lesmita B'iga yitmikitonj onggit gowukoi wa, nokim da idenat men yirkokar okasu Ti pilke. ¹⁰Ija naemb ji Godimna singi b'iyena mile pita awonj da, men maka Godind singi yiyenonda aji Tonit men singi niyeninonj dide ket Tina B'iga yitmikitonj meraina negir mile irabika si b'anggam. ¹¹Kor rigawar yena re kon singi eyeninyin, rada God odede kenaemb men singi niyeninonj, si medaka b'ogla mera wingirind singi b'itiyenindam. ¹²Makwa ke yipa rigat Godind yir yongonj. Aji ra men singi b'itiyenindam mera wingirind, God re indama wimena yikeny mera pilind dide Tina singi b'iyena mile re indama mera pilind ririrkip aeny.

¹³I God kea mera nokainonj Tina Wingawinga. Si ingkaemb men wumir aenindam da men wimena wuweny in re Godim pilnasim dide Todaka indama mera pilind wimena yikeny. ¹⁴I sin kea daka Tin yir yongonda dide ket yir ungata yit pitapita yommenonda da, B'u Tina B'iga yitmikitonj re onggit gowukoi riga wa yirkokar okawa mana. ¹⁵Yet ra b'atgenai da Yesu re Godimna B'iga e, si God indama ti pilind wimena yikeny, i todaka ket indama Godim pilind wimena yikeny. ¹⁶Si men kea wumir yokatonda dide gar ke utkunda yoramitonda onggit singi b'iyena milend rina re God yotobarkonj meranim.

I God re singi b'iyena God e. Si yet ra wimena ikeny onggit singi b'iyena milend, ton wimena yikeny re Godim pilnate, i God daka indama

ti pilind wimena yikeny. ¹⁷Si onggit mop paemb onggityam Godimna singi b'iyena mile ririrkip aeny mera wingirind. Nokim da idenat men moga kesa danda okasu dem b'isagika bibirind, nokip men re Keriso pila im wekeny in onggit gowukoyind. ¹⁸Si singi b'iyena milem pilind awir e kwa moga, nokip ririrkip auki singi b'iyena milet onggityam moga yiskeneny-a nokip moga re negir ma b'isagika kima e. Si yet ra moga taukeneny, onggityam singi b'iyena mile re ma ita ririrkip aukeneny ti pilind. ¹⁹Si men singi b'iyena mile amnikenenindam re nokip Godit men naska singi niyeninonj. ²⁰I ra yipa rigat indeny da kon ita Godind singi yiyenyin, aji ra ton gar ke utkunda ti nanyind o ti yingganind singi kesa omneneny, si ton re b'anyginena riga e. Mop nokip yet ra maka gar ke utkunda ti nanyind o ti yingganind singi iyeny yena re ton yir ongong yiyeny, ton ma ririr e Godind singi iyeny yena re ton maka yir ongong yiyeny. ²¹I God onggityam b'ingawa yit naemb mera nokainonj da yet ra Godind singi iyeny, ton b'ogla kwa singi yeyen gar ke utkunda ti nanyind o ti yingganind.

Gar ke Utkunda Godimna B'igam pilind

5 ¹Yet ra gar ke utkunda oramis da Yesu re Keriso e, ton re Godim pilke ukendi riga e. I yet ra Ti B'und singi iyeny, ton kwa opima Ti B'uim pilke ukendi b'igawar singi teyeniny. ²Si ra men Godind singi iyenyu dide Tina b'ingawa yit ririrind mile omnika teyenindam, si ingkaemb men wumir okasu da men opima Godimna b'igawar singi eyenindam. ³Nokip intemb ji Godim singi iyena mile da men Tina b'ingawa yit yimta undoka teyenindam. Si onggityam Tina b'ingawa yit re ma bebig im yimta undokam. ⁴Mop nokip yet ra Godim pilke tukenj, ton ita ji gowukoi gou wa yomneneny. Itemb ji gowukoi gou wa omnenam danda it re da meraina gar ke utkunda mile. ⁵Si ringgityam rigate onggit gowukoi gou wa yomneneny? Awir e kwa yete, aji ton nenate yete re gar ke utkunda yoramis da Yesu re Godimna B'iga e.

⁶Si itemb ji Yesu Keriso yet re yokatenonj nyi ke baptiso dide kus wul b'agbagind. Si Ton ma nyi ke baptiso nena na yokatonj, aji Ton yokatenonj re nyi ke baptiso dide kus wul b'agbagind. Si Yinayina Wingawinga re Ti gatabim yir ungata yit opurena riga e, nokip Ton re iminjogim rigib e. ⁷Si opimemb ji nowa yir ungata yit opurenayam Kerisom gatab. ⁸Si ton insimemb ji Yinayina Wingawinga i nyi ke baptiso i dide kus wul b'agbagind. I onggityam nowap yipaina yir ungata yit nena e yimjatenyi. ⁹Men opima rigaina yir ungata yit akatenindam. Si opimemb re ma ukoi im aji Godimna yir ungata yit re ukoi jog e. Si onggit paemb men b'ogla onggityam Godimna yir ungata yit yakatenu rina re Ton Ti B'igam gatab yir ungata yit yopulitonj. ¹⁰Yet ra Godimna B'igam pilind gar ke utkunda oramis, ti ita ji onggityam yir ungata yit yibnau

ti pilind. I yet ra maka Godim pilind gar ke utkunda oramis, ton Godind yommeneny re b'anyginena riga ma. Nokip ton maka gar ke utkunda ke yokas onggityam yir ungata yit rina re God yir ungata yit yopulitonj Tina B'iga gatab. ¹¹I itemb ji yir ungata yit da God mera nokainonj dadal ngirpu kesa yirkokar i ket itemb yirkokar yibim re Tina B'igam pilnate. ¹²Yet ra onggit B'igand okas, ton kea itemb yirkokar yokas. Aji yet ra maka onggit B'igand okas, ton makaya onggityam yirkokar yokas.

Undwatapu Yitkak

¹³I kon onggityam yitkak wanim mim erikainyin yepim re win Godim B'igamna nyiwim pilind gar ke utkunda yoramisya. Nokim da idenat win wumir okasya da wa ita ebnau dadal ngirpu kesa yirkokar wa pilind. ¹⁴I mera ita ji onggityam moga kesa danda Godind wip owarkitam. Si ra men nangga mana ra Godind igekisu Tina singi ririrind, Ton opima men yit nututkunjiny. ¹⁵I men ita wumir yokatenyu da Ton opima men yit nutkundeniny nangga mim re men yigekenyu, si itemb re iminjog e. Si odede nya ke men kwa b'ogla wumir yakatenu da men opima onggityam gasa Ti pilke akatenindam nangga mim re men yigekenyu.

¹⁶Si yet ra gar ke utkunda ti nanyind o ti yingganind yir ong negir mile omnikand rinte ra maka ujim ominy, ton b'ogla Godind yegeken ti gatab. I God ita ti yirkokar okau. Si kon nindeniyin re towanim ma yepim re onggityam negir mile amnikenenanj rinte ra maka ujim ominy. Aji kwa ita ji negir oikindena mile rinte ra ujim ominy. Si kon ma nok ma nindeniyin da man b'ogla onggit gatab Godind erkenyit. ¹⁷Komkesa kaokao mile re negir mile im. Aji ita ji negir mile rinte ra maka ujim ominy.

¹⁸I men wumir im da yet ra Godim pilke tukenj, ton ma ita negir mile oikindenand ibim. Nokip Godim pilke ukendi Kerisote tin yirgong omnika yiyeny, si negir wingawinga Satana ma ririr e tin esopai. ¹⁹I men wumir im da men re Godim pilke riga im. Aji daka komkesa gowukoi riga wekeny re negir wingawinga Satanamna wira nasim. ²⁰I men kwa wumir im da Godimna B'iga re kea ikonj dide kea mera multekipind wumir nokainonj, nokim da idenat men iminjog Godim wumir taukindam. Si men kea iminjog Godim pilnasim aindam, it re da Godimna B'iga Yesu Kerisom pilnasim. Si itemb Yesu Keriso re iminjog God e dide Ton re dadal ngirpu kesa yirkokar e. ²¹Kor b'igawar! Win walenggyam b'obogil yirgong auka tuwenyit b'anyginena god aidol wa pilke rinsim re b'anyginena ouyaena rigap auyaenenanj.